



Budapest ei in marcau fascinont cun bia baghetgs el stil baroc.


FOTOS S. ROTHMUND

Vacanzas magnificas navigond sil Danubi (part 1)

Il flum il secund liung dall'Europa e la fascinaziun dil Balcan

DA SUSI ROTHMUND / ANR

■ Far vacanzas silla cruschera che ha menau nus sil Danubi (Donau) da Passau tochen alla Mar nera ed anavos ei propi stau vacanzas da ruassar e guder. Malgrad che nus havein visitau diesch tiaras, gudiu cuntradas magnificas alla riva dil flum il secund liung dall'Europa e viu massa metropolas pulsontas havein nus mai stuiu pachetar cofras ni midar stanza. Nies hotel



era il bastiment da Rivages Flussreisen e quel ha purschiu tut confort, ina cuschina exquisita ed in transport segir e senza la hectica dil traffic sin via. Empau traffic havein nus denton aunc stuiu supporter sil viadi cul bus dalla Svizra a Passau. Cupidond ein quellas uras denton vargadas spert ed a Passau spitgavan in tschuat bastiments sin lur passagers. Els fuvan in pli bials che l'autoer e nus havein tschercau ed anflau l'Amadeus Elegant. In bastiment propi elegant cun tut il luxus, mo a partir da l'autoer onn dispona la societad gia puspei d'in bastiment reschniev ed aunc bia pli luxurius pil viadi sil Danubi. Encunter sera ei Amadeus semess en moviment ed ils hospis han gudiu la cuntrada e senti la pacificadad da quella moda da viagir. Da tscheina havein nus empriu d'enconuscher dus simpatics pers culs quals nus havein partiu la meisa duront igl entir viadi e la chemia ha constau immediat. Ils temas da discussiun han mai muncau e nus havein fatg enqual risada. Auters han midau meisa pliras ga duront il viadi, tochen ch'els ein stai el dretg liug – ed era quei ha il personal zun attent possibilitau. Ei fageva la pareta ch'els hagien empriu da leger quasi tut ils giavischs giu dils eglis da lur hospis.

Vienna e Budapest

Vienna ei stau igl empem marcau che nus havein visitau ed il scharm da quei marcau cun tut sias facetas ha fascinau e fatg gust sin dapli. Oravontut il marcau



Sil viadi culla cruschera da Passau tochen el Delta dil Danubi ha l'emprema excursiun menau el bellezia marcau da Vienna cul Stephansdom.

vegl cul «Steffi» – sco ils da Vienna numnan lur dom – ha attratg l'attenziun ed ins havess aunc ditg pudiu spassegiar tras ils quaters dil marcau vegl culs tipics cafes ed imposants baghetgs. Vienna valla dil reminent sco marcau cun fetg aulta qualitat da viver. Tenor in studi dil 2011 che cumpareglia la qualitat da viver da 221 metropolas figurescha Vienna gest suenter Melbourne ed avon Vancouver sil secund rang. Gudiu mintga minuta havein nus era l'autoer di a Budapest ell'Ungaria, in marcau cun rodund dus milliuns habitonts. A moda zun cumpetenta ed eloquentia ha nies guid da Budapest declarau architectura, veta quotidiana ed era tradiu problematicas dils indigens. El ha menau nus els bials loghens dallas parts «Buda» e «Pest» che vegnan spartidas dil Danubi ed era possibilitau da mirar da surengiu silla metropola.

Belgrad ed il Portal da fier

Il quart di havein nus visitau Belgrad, il marcau principal dalla Serbia ch'ei enconuscents pervia da sia veta da notg activa e vegn per quei motiv era numnaus «Barcelona digl ost». Il center dil marcau culla via da pedunzs Knez Mihailova envida da flunar e sefermar per in sitg. Impressiunonta ei la fortezia da Belgrad e leu sesarva era ina biala vesta sil Danubi.

Mo ton quella fortezia sco entginas ruinas regordan aunc adina als conflicts dil Kosovo ed en in mir ni l'autoer havein nus viu las nodas che bombardaments han schau anavos. Il proxim di havein nus traversau il parc naziunal «Eisernes Tor» e buca bandunau il bastiment. Sin siu viadi da 2880 km tochen ella Mar nera ha il Danubi da surmontar enqual impediment ed enteifer milliuns dad onns eis el sefiritgaus tras enzacontas barrieras da muntognas ed igl ei fascinont da guder la cuntrada ellas passaschas pli stretgas che sebrattan cun talas che paran bunamein dad esser lags.

St. Georg e la bellezia dil Delta dil Danubi

En Bulgaria ei il marcau Russe – che sesanfla 320 km naven da Sofia – staus nosa finamira e pli tard havein nus era visitau ina dallas baselgias el grep dad Ivanovo. Las frescas ella baselgia «Sveta Bogoroditsa» ein enconuscentas sigl entir mund e figureschan sin la gliesta dil patrimoni cultural mundial dall'Unesco. Visitond quei liug essan nus sedumandai tgei che ha intimau ils carstgauns da cavar lur sanctuari taluiva el grep ed era la paupradad dalla gronda part dalla populaziun ha dau da patertgar. Igl ei vegniu pli e pli cauld sin nies viadi ed a St. Georg (970 habitonts) en Rumenia han temperaturas da tochen 44 grads fatg luvrar ils indrezs d'aria cundiziunada pir che mai. Aschi cauld eis ei denton mo stau giu sper la Mar nera e l'arrivada en quei liug magnific ei vegnida festivada silla punt dil bastiment cun in apero, musica ed in viva cun champagne. L'excursiun culs bastiments dils pescadurs – che han culs onns saviu baghegiar si in'existenza grazia al turissem – ei stada in'aventura fascinonta e beinenqualin ei sedumandaus co ils pescadurs anflan la via en quei labirint d'aua e paliu che semida incuntin. Leu el territori da paliu il pli grond dall'Europa vivan varga 5000 sorts da plantas ed animals. Igl ei in paradis per ornitologs che san cun empau cletg observar da quei da 300 sorts utschals. Ell'aua buglia ei da peschs e silla tiara vivan gats selvadis, lufs, pors selvadis, uolps ed ella vischinonza dalla riva era ludras.

Ulteriuras informaziuns e prospects: www.rivage-flussreisen.ch



Il flum Danubi sparta il marcau ellas parts «Buda» e «Pest».



Belgrad en Serbia ei in dils pli vegls marcaus dall'Europa.



El parc naziunal drova ei tut l'attenziun dils capitans per navigar segiramein tras las stretgas stortas dil Danubi ch'ei sefiritgaus duront mellis onns tras ils cuolms.



Las baselgias el grep dad Ivanovo raquentan da temps daditg vargai.



A St. Georg sper la Mar nera paran las uras dad ir empau pli plaun che tier nus.